



EUROPEAN COURT OF HUMAN RIGHTS  
COUR EUROPÉENNE DES DROITS DE L'HOMME

## ČETVRTI ODJEL

### ODLUKA

Aplikacija br. 51661/21  
Husejin ŠERBEČIĆ  
protiv Bosne i Hercegovine

Evropski su za ljudska prava (Četvrti odjel), zasjedajući 26.04.2022. kao odbor u sljedećem sastavu:

Tim Eicke, *predsjednik*,

Faris Vehabović,

Pere Pastor Vilanova, *sudije*,

i Ilse Freiwirth, *zamjenica registrara Odjela*,

imajući u vidu aplikaciju (br. 51661/21) koju je dana 15.10.2021. godine, prema članu 34. Konvencije za zaštitu ljudskih prava i osnovnih sloboda („Konvencija“) Sudu podnio državljanin Bosne i Hercegovine g. Husejin Šerbečić, koji je rođen 1961. godine i živi u Gračanici („aplikant“), a zastupala ga je gđa B. Dervišević, advokatica iz Sarajeva.

Nakon vijećanja, odlučio je kako slijedi:

### PREDMET SLUČAJA

Ovaj slučaj odnosi se na ocjenjivanje rada aplikanta, sudije općinskog suda. On se žali da njegov ocjenjivač nije bio nepristran budući da su konkurisali za istu poziciju u relevantno vrijeme. On se nadalje žali da je Visoko sudsko i tužilačko vijeće Bosne i Hercegovine, koje je razmatralo njegovu žalbu, propustilo navesti razloge za svoju odluku. Dana 5.05.2021. godine, Ustavni sud Bosne i Hercegovine je odbio njegovu žalbu zbog toga što u njegovom slučaju nije donesena bilo kakva sudska odluka. Aplikant se pozvao na članove 6. i 13. Konvencije.

## OCJENA SUDA

Opća načela u vezi s pravilom o iscrpljivanju domaćih pravnih lijekova navedena su u presudi *Vučković i drugi protiv Srbije* ((preliminarni prigovor) [VV], br. 17153/11 i 29 drugih, tačke 69.-77., 25.03.2014.).

Aplikant je mogao podnijeti aplikaciju za zaštitu svojih ustavnih prava protiv sporne odluke Visokog sudskog i tužilačkog vijeća Sudu Bosne i Hercegovine u skladu sa članom 67. Zakona o upravnim sporovima, („Službeni glasnik Bosne i Hercegovine“, br. 19/02, 88/07, 83/08, 74/10). Taj sud se već bavio sličnim predmetima (vidi, na primjer, odluke Suda Bosne i Hercegovine U-439/08 od 24.06.2008. i S13U017718 14 U od 16.12.2014.). Nadalje, protiv odluka Suda Bosne i Hercegovine donesenih u takvim slučajevima može se podnijeti apelacija Ustavnom sudu (vidi odluku Ustavnog suda AP-845/15 od 20.07.2016.).

Aplikant nije koristio taj pravni lijek. Nema indikacija, niti je to aplikant tvrdio, da taj pravni lijek ne bi bio efikasan, ili da postoje posebne okolnosti koje ga oslobađaju od zahtjeva da ga iskoristi.

Prema tome, aplikacija je nedopuštena zbog neiscrpljivanja domaćih pravnih lijekova te se mora odbaciti u skladu sa članom 35. stavovi 1. i 4. Konvencije.

Iz navedenih razloga, Sud je, jednoglasno,

*Proglasio* aplikaciju nedopuštenu.

Sačinjeno na engleskom jeziku i dostavljeno u pisanom obliku dana 19.05.2022. godine.

Ilse Freiwirth  
zamjenica registrara

Tim Eicke  
predsjednik